

SJEĆANJA

U periodu 1992. do početka 1996.godine prestala su da kucaju srca naših mnogih kolega i kolegica.

U vihoru ratnih dejstava izazvanih agresijom na Bosnu i Hercegovinu ugasili su se životi geodeta, pregalaca za unapredjenje i prosperitet geodetske struke. Njihovi likovi ostaće u sjećanjima nas koji preživjesmo ove strahote, ostaće sjećanja i za generacije koje će iza nas doći da na njihovim primjerima i ostavljenim radovima grade bolju budućnost na dobrobit svih građana Bosne i Hercegovine i geodetske struke.

RASIM MEHMEDBAŠIĆ, geodeta

Tokom svog radnog vijeka radio je na mnogim projektima izgradnje Bosne i Hercegovine. Svoj život je posvetio podizanju geodetske struke i prenošenju znanja na mlađe kadrove. Prošao je, kao partizan, strahote Drugog svjetskog rata i golgotu Golog otoka.

Posao geodete započinje radovima na premjeru teritorije Srbije, poslije Drugog svjetskog rata kao pomoćnik ministra za gradjevinarstvo Bosne i Hercegovine, te u preduzećima PP "Projekt", Birou za studije i unapredjenje poljoprivrede "Poljoprojekt" i Geodetskom zavodu Sarajevo, gdje je i penzionisan.

Nakon odlaska u zasluženu mirovinu vratio se iz Sarajeva u rodni grad Stolac iz koga je odveden na svoj posljednji put u logor Dretelj u kojem se ugasio njegov život.

KREŠIMIR BOŽIĆ, geodetski inženjer

Rodjen u Sarajevu 1932.godine, uzoran geodetski stručnjak, neumoran izvodjač geodetskih radova. Iza Kreše ostale su bezbrojne trase dalekovoda širom Bosne i Hercegovine. Specijalnost su mu bili geodetski radovi iz oblasti elektroprivrede i inženjerske geodezije.

Tragajući za oblastima koje su njegova sklonost i njemu bliske, u kojima može ispoljiti svoju stručnost našao je u Tuzli u preduzeću koje se bavi projektovanjem i gradjenjem objekata elektro privrede.

Rano je otišao umirovinu, ali nije time prestalo i njegovo ineresovanje za njemu dragu oblast.

Bio je aktivni član Saveza geodetskih inženjera i geometara Bosne i Hercegovine, a u jednom mandatu i predsjednik Saveza Podružnice Tuzla.

Ljubav prema rodnom gradu, pred agresiju na Bosnu i Hercegovinu, dovela ga je u Sarajevo.

Umro je od posljedica ranjavanja snajperskim hicem sa agresorske strane.

VERA PUŠARA, geometar

Iz svog rodnog Visokog krenula je u geodetsku školu Sarajevo, a nakon završetka počinje raditi kao geometar u Geodetskom zavodu, u preduzeću Poštansko telegrafsko-telefonskog saobraćaja Tuzla, a potom u Opštinskoj geodetskoj upravi Tuzla.

Radni vijek je provela na terenskim poslovima premjera i održavanja premjera.

Sudbina je htjela da svoj život završi u rodnom mjestu Visoko.

Neposredno pred iznenadnu smrt posjetila je Sarajevo, a smrt je zadesila u posjeti majčinom grobu.

ŠEVALIJA ŠERBEČIĆ, geodetski inženjer

Ševalija Šerbečić, geodetski inženjer, poginuo kao borac Drugog korpusa Armije Bosne i Hercegovine na obroncima Majevice braneći Tuzlu i Bosnu i Hercegovinu, od najezde četničkih falangi.

Rodjen je na području Opštine Gračanica, završio je Geodetsku srednju tehničku a potom Višu geodetsku školu u Sarajevu. Službovao je u Loparama i Tuzli.

Kraće vrijeme radio na poslovima održavanja premjera i katastra zemljišta, a potom nastavlja rad na geodetskim poslovima u oblasti vodoprivrede.

Agresija na Bosnu i Hercegovinu zatiče ga na poslovima u Vodoprivrednom preduzeću "Spreča" u Tuzli i odmah se uključuje u jedinice Drugog korpusa gdje ostaje do tragične pogibije.

MEHMEDBAŠIĆ ESAD, geodeta

Kao mlad geometar kreće putem geometra na premjeru teritorije Srbije, a poslije Drugog svjetskog rata na katastarskim poslovima u Livnu i Tuzli. Jedan period radi u vojnostambenom odjeljenju, a potom u Birou za geodetske radove Tuzla.

Smrt ga zatiče daleko od rodnog Stoca u Tuzli. Kao što je "tihu" živio, podnoseći porodične tragedije, tako je u toku agresije na Tuzlu i Bosnu i Hercegovinu nečujno zauvijek nestao.

NUKOVIĆ ALIJA, geodetski inženjer

Rodjen je u Trebinju 1927.godine. Po završetku Geodetske tehničke škole u Sarajevu radi kao geometar u "Georadu" Geodetske uprave Bosne i Hercegovine, a potom dolazi u Tuzlu. Obavljao je raznovrsne poslove u katastarskoj upravi Šreza Tuzla, Birou za geodetske radove Tuzla, Zavodu za urbanizam, a kraj radnog vijeka ga zatiče u Opštinskoj upravi za geodetske i imovinsko-pravne poslove. Višu geodetsku školu završio je u Sarajevu.

I kao umirovljenik interesuje se za stanje u geodetskoj djelatnosti, daje upute i savjete mladim kolegama, na mladje prenosi iskustvo stečeno na raznovrsnim poslovima katastra zemljišta, urbanizma i inženjerske geodezije.

Pored teških povreda zadobijenih u saobraćajnoj nesreći radi na poboljšanju materijalnog položaja porodice, održava kontakte sa ustanovama u kojima je službovao i pomaže rad Saveza geodetskih inženjera i geometara Podružnice Tuzla.

Umro je u Tuzli 1996.godine.

Sjećajući se poginulih i umrlih geodeta izražavamo zahvalnost za sve što su uradili za geodetsku djelatnost sa porukom da se ne zaborave i da mladi u njihovim primjerima nadju put za svoje djelovanje i rad.

Mustafa Begić